

BOSNA I HERCEGOVINA
FEDERACIJE BOSNE I HERCEGOVINE
SREDNJOBOSANSKI KANTON
OPĆINSKI SUD U BUGOJNU
Broj: 46 0 Su 123027 25 Su
Bugojno, 17.03.2026. godine

Na temelju člana 31. Zakona o sudovima u Federaciji BiH („Službene novine FBiH“, br. 38/2005, 22/2006, 63/2010, 72/2010, 7/2013, 52/2014 i 85/2021), člana 8. Pravilnika o unutrašnjem sudskom poslovanju („Službeni glasnik BiH“, br. 66/2012, 40/2014, 54/2017, 60/2017, 30/2018 i 83/2022) i člana 41. Pravilnika o unutrašnjoj organizaciji i sistematizaciji radnih mjesta u Općinskom sudu u Bugojnu, u postupku provođenja Zakona o zaštiti ličnih podataka BiH („Službeni glasnik BiH“, br. 12/2025), predsjednica Općinskog suda u Bugojnu d o n o s i:

PRAVILA PRIVATNOSTI OPĆINSKOG SUDA U BUGOJNU

Cilj Pravila privatnosti Općinskog suda u Bugojnu je da u skladu sa članom 68. Zakona o zaštiti ličnih podataka BiH (u daljem tekstu: Zakona), svim licima čije lične podatke obrađuje u okviru postupaka koje provodi, uz izuzetke propisane posebnim zakonom, pruži osnovne informacije o obradi i njihovim pravima na transparentan način.

Pravila privatnosti se primjenjuje na sve lične podatke koje Sud prikuplja, upotrebljava ili na drugi način obrađuje, direktno ili putem svojih partnera, trećih osoba.

Prema Zakonu o zaštiti ličnih podataka BiH, dole navedeni pojmovi imaju sljedeća značenja:

Lični podatak je svaki podatak koji se odnosi na fizičku osobu čiji je identitet utvrđen ili se može utvrditi.

Obrada ličnih podataka je svaki postupka ili skup postupaka koji se obavlja na ličnim podacima ili na skupovima ličnih podataka, automatiziranim ili neautomatiziranim sredstvima kao što su prikupljanje, evidentiranje, organizacija, struktuiranje, čuvanje, prilagođavanje ili izmjena, pronalaženje, ostvarivanje uvida, upotreba, otkrivanje prijenosom, širenjem ili stavljanjem na raspolaganje na drugi način, usklađivanjem ili kombiniranje, ograničenje, brisanje ili uništavanje.

Kontrolor podataka je fizičko ili pravno lice, javni organ ili nadležni organ koji samostalno ili sa drugim određuje svrhe i sredstva obrade ličnih podataka.

Nadležni organ je organ koji je nadležan za sprečavanje, istragu i otkrivanje krivičnih djela, gonjenje učinilaca krivičnih djela ili izvršenje krivičnih sankcija, uključujući i zaštitu i sprečavanje prijetnji javnoj sigurnosti, kao i pravna lica ako su zakonom ovlaštena za obavljanje ovih poslova kao posebna kategorija.

1. PRAVNI OSNOV I SVRHA ZA OBRADU LIČNIH PODATAKA

U skladu sa članom 22. Zakona o sudovima u Federaciji BiH ¹ Općinski sud u Bugojnu nadležan je za područje općina Bugojno, Gornji Vakuf – Uskoplje i Donji Vakuf.

¹ „Službene novine FBiH“, br. 38/2005, 22/2006, 63/2010, 72/2010 - ispr., 7/2013, 52/2014 i 85/2021.

Vaše lične podatke Općinski sud u Bugojnu obrađuje u skladu sa Zakonom o zaštiti ličnih podataka BiH izvršavajući svoje nadležnosti i ovlaštenja. Na osnovu člana 27. Zakona o sudovima u Federaciji BiH Općinski sud u Bugojnu nadležan je:

1) U krivičnim predmetima:

a) da u prvom stepenu sudi:

- za krivična djela za koja je zakonom propisana kao glavna kazna novčana kazna ili kazna zatvora do 10 godina, ako posebnim zakonom nije određena nadležnost drugog suda;
- za krivična djela za koja je posebnim zakonom određena nadležnost općinskog suda;
- za krivična djela za koja je Sud Bosne i Hercegovine prenio nadležnost na općinski sud;
- u svim krivičnim postupcima protiv maloljetnika;

b) da postupa tokom istrage i nakon podizanja optužnice u skladu sa zakonom;

c) da odlučuje o vanrednim pravnim lijekovima kad je to zakonom predviđeno;

d) da odlučuje o brisanju osude i prestanku mjera sigurnosti i pravnih posljedica osude, na osnovu sudske odluke i

e) da postupa po molbama za pomilovanje u skladu sa zakonom.

2) U građanskim predmetima da u prvom stepenu sudi:

a) u svim građanskim sporovima i

b) u vanparničnom postupku.

3) U drugim predmetima:

a) da vodi izvršni postupak, ako zakonom nije drugačije određeno;

b) da određuje mjere osiguranja, ako zakonom nije drugačije određeno;

c) da rješava u posebnim postupcima, ako zakonom nije drugačije određeno;

d) da obavlja zemljišno-knjižne poslove u skladu sa zakonom;

e) da pruža pravnu pomoć sudovima u Bosni i Hercegovini;

f) da vrši poslove međunarodne pravne pomoći, ako zakonom nije određeno da neke od tih poslova vrši kantonalni sud;

g) da vrši poslove upisa u registre pravnih lica i

h) da vrši druge poslove određene zakonom.

Temeljem zaštite legitimnih interesa, Općinski sud u Bugojnu može obrađivati lične podatke prilikom evidentiranja ulazaka u zgradu Suda ili video-nadzora zgrade.

2. KOJA PRAVA IMAJU NOSIOCI PODATAKA U VEZI SA OBRADOM LIČNIH PODATAKA?

- 2.1. Pravo na podnošenje prigovora** - Nosilac podataka ima pravo na osnovu svoje posebne situacije u svakom trenutku kontroloru podataka podnijeti prigovor na obradu njegovog ličnog podatka, sve u skladu sa članom 23. Zakona o zaštiti ličnih podataka BiH.
- 2.2. Pravo nosioca podataka na pristup ličnom podatku** - Nosilac podataka ima pravo da dobije informacije od kontrolora podataka o svrsi obrade kategoriji ličnog podatka koji se obrađuje i drugim okolnostima, u skladu sa članom 17. Zakona o zaštiti ličnih podataka BiH.
- 2.3. Pravo na ispravku** - Nosilac podataka ima pravo na ispravku netačnog ličnog podatka, bez nepotrebnog odgađanja, u skladu sa članom 18. Zakona o zaštiti ličnih podataka BiH. U zahtjevu za ispravku, nosilac podataka mora tačno navesti šta nije tačno i kako je podatak potrebno ispraviti, uz priloženu dokumentaciju kojom potvrđuje svoje navode iz zahtjeva.
- 2.4. Pravo na brisanje** - Nosilac podataka ima pravo da mu kontrolor podataka omogući brisanje ličnog podatka koji se na njega odnosi ako: lični podatak više nije neophodan za svrhe u koje je prikupljen ili na drugi način obrađen; nosilac podataka povukao je

saglasnost na kojoj je obrada zasnovana; nosilac podataka uložio je prigovor na obradu u skladu s članom 23. stav (1) ovog zakona i ne postoje zakonski razlozi za obradu ili je nosilac podataka uložio prigovor na obradu u skladu s članom 23. stav (2) Zakona; lični podatak je nezakonito obrađen; lični podatak mora biti obrisani radi postupanja u skladu sa zakonskom obavezom kojoj podliježe kontrolor podataka; lični podatak je prikupljen u vezi s ponudom usluga informacionog društva iz člana 10. stav (1) Zakona, a sve u skladu sa članom 19. Zakona o zaštiti ličnih podataka BiH.

Za ostvarivanje svojih prava možete se obratiti Sudu pisanim putem ili putem elektronske pošte. Ako ste nezadovoljni postupanjem Suda možete se obratiti i nadležnom nadzornom organu Agenciji za zaštitu ličnih podataka ili tužbom nadležnom sudu.

3. SIGURNOST LIČNIH PODATAKA

Lični podaci se obrađuju na način da se osigura odgovarajuća sigurnost ličnih podataka, uključujući i zaštitu od neovlaštene ili nezakonite obrade i od slučajnog gubitka, uništenja ili oštećenja primjenom odgovarajućih tehničkih ili organizacionih mjera. Također se vodi računa o primjeni principa zakonite obrade ličnih podataka, uz poštivanje vremenskog perioda čuvanja ličnih podataka kao i njihovu raspoloživost.

Svi državni službenici i namještenici koji su uposlenici Općinskog suda u Bugojnu potpisali su izjavu o obavezi čuvanja povjerljivosti ličnih podataka.

4. VREMENSKI PERIOD ČUVANJA LIČNIH PODATAKA

Lični podaci se čuvaju onoliko koliko je potrebno za svrhu zbog koje se obrađuju. Nakon prestanka svrhe za koju se obrađuju i u koju su prikupljeni, vaši podaci više se ne koriste, ali se čuvaju u arhivi onoliko vremena koliko obavezuju zakonski propisi o arhivskoj građi.

5. PRIJENOS LIČNIH PODATAKA DRUGIM KONTROLORIMA PODATAKA

Lične podatke Općinski sud u Bugojnu prenosi drugim kontrolorima podataka – pružaocima informatičko-komunikacijskih usluga sa kojima ima sklopljen ugovor na način da se poštuju pravila postupanja sa ličnim podacima. Lične podatke Općinski sud u Bugojnu će dati trećoj strani ukoliko je potrebno za izvršavanje zakonom propisanih obaveza, a vaše podatke Sud neće prenositi drugim kontrolorima u inostranstvu, osim ukoliko takva obrada nije neophodna na osnovu zakona ili međunarodnog ugovora koji ga obavezuje.

6. KORIŠTENJE KOLAČIĆA I OBJAVA SADRŽAJA NA WEB-STRANICI

Objavljivanje sudskih odluka/presuda i sadržaja na web stranici Suda vršit će se u skladu sa zakonima BiH, poštujući princip transparentnosti rada sudova, uzimajući u obzir javni interes, pravo na zaštitu privatnosti i zaštitu ličnih podataka, te zaštitu interesa maloljetnika, svjedoka i oštećenog.

Na službenoj internet stranici Općinskog suda u Bugojnu koriste se obavezni, odnosno tehnički kolačići (engl. *cookies*). Ti kolačići su male datoteke koje omogućavaju ispravan rad internet stranice i ne možemo ih isključiti, te za njihovo korištenje ne trebamo vašu saglasnost. Obavezni kolačići ne pohranjuju nikakve informacije koje bi vas mogle identifikovati.

7. PROMJENE PRAVILA PRIVATNOSTI

Općinski sud u Bugojnu ažurirat će Pravila privatnosti kako bi sadržavala tačne informacije. O svim izmjenama i dopunama bit ćete blagovremeno informisani u skladu sa principom transparentnosti.

8. PODACI O KONTROLORU I SLUŽBENIKU ZA ZAŠTITU LIČNIH PODATAKA

Općinski sud u Bugojnu,

307.motorizovane brigade, Bugojno, Bosna i Hercegovina

E-mail: opsud-bugojno@pravosudje.ba

Tel: 030/251-005

Fax: 030/251-083

Službenik za zaštitu ličnih podataka Općinskog suda u Bugojnu imenovan Rješenjem broj: 46 0 Su 123027 25 Su 4 od 16.09.2025. godine:

- Lejla Muminović, stručna saradnica za odnose s javnošću – glasnogovornica suda.

E-mail: lejla.muminovic@pravosudje.ba; tel: 030/251-005.

Službenik za zaštitu ličnih podataka obavlja zadatke u skladu sa članom 41. Zakona o zaštiti ličnih podataka BiH.



Predsjednica Općinskog suda u Bugojnu

Randžana Hadžibegović Haračić